

REGLUR

fyrir Háskólann á Hólum.

I. KAFLI

Hlutverk háskólans.

1. gr.

Háskólinn á Hólum er vísindaleg fræðslu- og rannsóknastofnun á háskólastigi. Starfsemi skólans byggist á lögum nr. 85/2008 um opinbera háskóla með áorðnum breytingum og lögum um háskóla nr. 63/2006. Háskólinn á Hólum er miðstöð fyrir kennslu og rannsóknir í hestafræðum, reiðmennsku og reiðkennslu, fiskeldi og fiskalíffræði og ferðaþjónustu í dreifbýli. Við skólann er heimilt að starfrækja alþjóðlega deild í reiðmennsku og hestafræðum þar sem innheimta má skólagjöld. Stjórn Háskólans á Hólum er heimilt að stofna til kennslu eða rannsókna á öðrum fræðasviðum, enda uppfylli starfsemin skilyrði til viðurkenningar samkvæmt lögum nr. 63/2006, um háskóla.

II. KAFLI

Stjórnskipulag.

2. gr.

Háskólaráð.

Stjórn Háskólans á Hólum er falin háskólaráði og rektor. Háskólaráð markar heildarstefnu í kennslu og rannsóknnum og mótar skipulag háskólans. Háskólaráð fer með almennt eftirlit með starfsemi háskólans í heild og ber ábyrgð á því að hann starfi í samræmi við lög og stjórnvaldsfyrirmæli. Háskólaráð fer með úrskurðarvald í málefnum háskólans og stofnana sem honum tengjast og heyrar undir háskólaráð.

Háskólaráð ber ábyrgð á framkvæmd samstarfssamninga sem háskólinn gerir við fyrirtæki og aðrar stofnanir. Þá hefur háskólaráð yfirumsjón með fyrirtækjum, sjóðum og almennum eignum Háskólans á Hólum.

Háskólaráð setur reglur og viðmið um ráðningu starfsfólks skólans.

Háskólaráð getur framselt ákvörðunarvald sem rektor eða öðrum stjórnendum er fengið í einstökum málum eða málaflökkum enda sé það gert skriflega og tilkynnt sérstaklega.

Í háskólaráði sitja auk rektors, tveir fulltrúar háskólasamfélagsins tilnefndir af háskólafundi, einn fulltrúi tilnefndur af stúdentafélagi Háskólans á Hólum, einn fulltrúi tilnefndur af mennta- og menningarmálaráðherra og tveir fulltrúar tilnefndir af þeim fulltrúum sem fyrir eru í háskólaráði. Háskólaráð er skipað til tveggja ára í senn. Varamenn sitja fundi ráðsins í forföllum aðalfulltrúa. Óski þrjár háskólaráðsfulltrúar eftir fundi er rektor skylt að boða til hans. Rektor er formaður háskólaráðs og boðar til funda eftir þörfum. Háskólaráðsfundur er ályktunarbær ef fimm atkvæðisbærir háskólaráðsmenn sækja fund hið fæsta. Afl atkvæða ræður úrslitum mála. Falli atkvæði jöfn ræður atkvæði rektors úrslitum. Færa skal til bókar ákvarðanir háskólaráðs.

3. gr.

Rektor.

Rektor er formaður háskólaráðs. Rektor er yfirmaður stjórnsýslu háskólans og æðsti fulltrúi Háskólans á Hólum gagnvart mönnum og stofnunum innan háskólans og utan hans. Hann stýrir starfsemi háskólans og hefur frumkvæði að því að háskólaráð marki sér heildarstefnu í málefnum háskólans. Rektor ber ábyrgð á og hefur eftirlit með allri starfsemi háskólans, þ.m.t. ráðningar- og fjármálum deilda og stofnana. Hann ber ábyrgð á gerð starfs- og rekstraráætlna og að þær séu samþykktar af háskólaráði. Á milli funda háskólaráðs fer rektor með ákvörðunarvald í öllum málum háskólans. Rektor ræður deildarstjóra allra deilda og setur þeim erindisbréf eða starfslýsingar. Háskólaráð getur heimilað að rektor ráði aðstoðarrektor, einn eða fleiri.

Rektor ræður starfsfólk sameiginlegrar stjórnsýslu háskólans og setur því erindisbréf eða starfslýsingar.

4. gr.

Skipun rektors.

Menntamálaráðherra skipar rektor til fimm ára samkvæmt tilnefningu háskólaráðs, en um skipun rektors við háskólann er fjallað í 1. mgr. 8. gr. laga nr. 85/2008. Við val á rektor skal háskólaráð tilnefna þrjá menn í valnefnd til að meta hæfni umsækjenda og skal einn þeirra tilnefndur sem formaður nefndarinnar. Valnefndarmenn skulu hafa lokið æðri prófgráðu við háskóla og hafa auk þess marktæka stjórnunarreynslu á háskólastigi. Hæfni umsækjenda um embætti rektors skal metin í ljósi heildarmats með tilliti til vísinda- og útgáfustarfa, ferils sem háskólakennara eða í öðrum störfum, stjórnunarreynslu og með tilliti til þess hversu menntun og reynsla viðkomandi muni nýttast í starfi rektors. Engum má veita embætti rektors nema meirihluti valnefndar hafi látið í ljós það álit að viðkomandi teljist hæfur til að gegna starfinu. Ef sitjandi rektor háskólans sækist eftir endurtilnefningu skal hann víkja af fundi háskólaráðs við afgreiðslu málsins.

Háskólaráð skal annast um auglýsingu á lausu starfi rektors og getur ráðið falið sitjandi rektor að annast framkvæmd þar að lútandi.

5. gr.

Háskólafundur.

Háskólafundur er samráðsvettvangur háskólasamfélagsins þar sem fram fer umræða um þróun og eflingu háskólans. Háskólafundur mótar og setur fram sameiginlega vísinda- og menntastefnu háskólans að frumkvæði rektors. Háskólaráð getur leitað umsagnar háskólafundar um hvaðeina sem varðar starfsemi háskólans. Háskólaráð getur einnig falið háskólafundi umfjöllun um fagleg málefni og akademíska stefnumörkun.

Háskólafundur er ályktunarbær um þau málefni sem fundurinn telur að varði hag háskólasamfélagsins.

Á háskólafundi eiga sæti allir fastráðnir starfsmenn Háskólans á Hólum sem og tíu fulltrúar nemenda. Fulltrúar nemenda skulu kjörnir í sérstökum kosningum til tveggja ára í senn.

Rektor boðar háskólafund og stýrir honum eða felur öðrum stjórn hans. Háskólafund skal halda að minnsta kosti einu sinni á hverju ári. Æski 2/3 hlutar fulltrúa á háskólafundi fundar er rektor skylt að boða til hans.

6. gr.

Framkvæmdaráð.

Framkvæmdaráð skólans sinnir daglegum rekstri og samræmir starf deilda og sviða. Í framkvæmdaráði sitja rektor, deildarstjórar, skrifstofu- og fjármálastjóri.

7. gr.

Skrifstofu- og fjármálastjóri.

Rektor ræður skrifstofu- og fjármálastjóra sem er yfirmaður fjármála- og þjónustusviðs háskólans.

Hlutverk skrifstofu- og fjármálastjóra er að: A) Annast fjárreiður skólans í umboði rektors. Með sama hætti undirbýr hann árlega fjárhagsáætlun í samstarfi við framkvæmdaráð háskólans og hefur eftirlit með því að rekstur sé í samræmi við gildandi heimildir. B) Hafa yfirumsjón með starfsmannamálum, umsjón fasteigna og stodeininga. Hann ber einnig ábyrgð á þjónustuhluta rekstrarsviðsins og á gæðum þjónustu við nemendur, starfsfólk og gesti skólans.

8. gr.

Rannsóknasvið.

Hlutverk rannsóknasviðs er að efla rannsóknir við skólann. Rektor skipar sviðsstjóra til þriggja ára. Rektor skipar rannsóknanefnd eftir tilnefningu deilda. Í rannsóknanefnd situr einn fulltrúi frá hverri deild auk sviðsstjóra, sem er formaður nefndarinnar. Rannsóknasviði ber að veita aðstoð við gerð umsókna og stýringu rannsóknaverkefna. Rannsóknanefnd aðstoðar við mótun rannsóknastefnu, heldur utan um tölfraði um rannsóknir við skólann og sinnir gæðaeftirliti með rannsóknum.

9. gr.

Kennslusvið.

Hlutverk kennslusviðs er að halda nemendaskrá, kennsluskrá og miðlun náms- og kennslutengdra upplýsinga til nemenda og kennara.

Rektor skipar sviðsstjóra kennslumála til þriggja ára, sem jafnframt er sviðsstjóri framhaldsnáms. Hann hefur yfirumsjón með samræmingu námsbrauta. Starfsmenn kennslusviðs hafa umsjón með nemendabókhalði, inntöku nemenda og aðstoða deildir við skipulag kennslu og sjá um gerð kennsluskrár.

Kennslunefnd er skipuð af rektor til þriggja ára, eftir tilnefningu deilda og nemenda. Í henni sitja sviðsstjóri kennslumála, sem er formaður, einn fulltrúi frá hverri deild og tveir fulltrúar nemenda. Kennslunefnd ber ábyrgð á gæðastjórnun námsins, sbr. 16. gr. og ákveður úrbætur eftir því sem þörf krefur í samvinnu við framkvæmdaráð háskólans. Kennslunefnd samþykkir kennsluskrár fyrir einstakar námsbrautir, mótar reglur um skráningu og eftirlit með framvindu náms, setur meginreglur og ber ábyrgð á inntöku nemenda, námsmati og mati á öðru námi. Jafnframt fjallar kennslunefnd um málefni sem varða tæknileg atriði í námi og samstarf við aðrar háskólastofnanir. Kennslunefnd sker úr um ágreiningsmál sem upp kunna að koma í framkvæmd kennslu eða námsmats. Þegar til umræðu eru málefni er tengjast einstaka nemendum skulu fulltrúar nemenda víkja af fundum og ekki taka þátt í umfjöllun og ákvarðanatöku nefndarinnar. Úrskurðum kennslunefndar má áfrýja til rektors og til áfrýjunarnefndar í kærumálum háskólanema, sbr. 21. gr. laga um háskóla nr. 63/2006.

Í hverri deild skal starfa námsnefnd, sem skipuð er tveimur kennurum, skipuðum af deildarstjóra og tveimur fulltrúum sem tilnefndir eru af nemendum deildar. Námsnefnd er skipuð til eins árs í senn. Námsnefndin er vettvangur umræðu um þróun kennsluskrár, kennsluáætlanir og framvindu námskeiða.

10. gr.

Svið framhaldsnáms.

Rektor skipar sviðsstjóra framhaldsnáms til þriggja ára, sem er jafnframt sviðsstjóri kennslusviðs. Hann hefur yfirumsjón með samræmingu á framhaldsnámi innan skólans. Rektor skipar framhaldsnámsnefnd eftir tilnefningu deilda og framhaldsnema. Í nefndinni sitja einn fulltrúi frá hverri deild, fulltrúi framhaldsnema auk sviðsstjóra, sem er formaður nefndarinnar. Hlutverk framhaldsnámsnefndar er að tryggja tengsl við aðrar menntastofnanir og hafa forgöngu um samræmingu námsins. Hún ber ábyrgð á gæðastjórnun námsins, sbr. 16. gr. Framhaldsnámsnefnd sér um inntöku nýrra nemenda í framhaldsnám, hefur eftirlit með framvindu náms, tilnefnir prófdómara og prófnefndir, sér um skipun leiðbeinanda utan skólans og heldur utan um rannsóknánámssjóð Háskólans á Hólum.

11. gr.

Deildarstjórar.

Stjórn háskóladeilda er í höndum deildarstjóra sem skipaður er af rektor til tveggja ára í senn, samkvæmt tilnefningu deildarfundar. Þeir stjórna málefnum hvarrar deildar háskólans, í umboði rektors og háskólaráðs, og hafa frumkvæði að mótun stefnu hennar. Þeir vinna fjárhagsáætlun fyrir deildina í samráði við fjármálastjóra og bera ábyrgð á mannahaldi og öllum aðföngum deildarinnar. Þeir bera ábyrgð á fasteignum, aðstöðu, búnaði og öðrum eignum skólans sem tilheyra deildinni og gera áætlanir um uppbyggingu og nýtingu þeirra. Deildarstjórar bera faglega ábyrgð á kennslu- og rannsóknastarfsemi deildanna og stýra daglegri starfsemi og rekstri þeirra.

12. gr.

Deildarfundir.

Deildarfundir fjallar um fagleg málefni hvarrar deildar og skal boðað til þeirra minnst einu sinni á ári. Á deildarfundum eiga sæti allir fastráðnir starfsmenn deildarinnar og tveir fulltrúar nemenda kjörnir til eins árs í senn. Tilgangur deildarfunda er að:

- vera vettvangur umræðna um markmið og hlutverk deildarinnar,
- fjalla um skipulag kennslu, námsframboð og námsleiðir,

- fjalla um rannsóknir í háskóladeildum,
- fjalla um fagleg málefni sem snerta deildina,
- kjósa í ráð og nefndir,
- kjósa deildarstjóra.

13. gr.

Kjör deildarstjóra.

Deildarstjóri skal kosinn úr hópi prófessora, dósenta og lektora deildarinnar sem gegna fullu starfi. Deildarstjóri er kosinn til tveggja ára í senn, með skriflegri kosningu. Upphaf kjörtímabils miðast við 1. ágúst og lok við 30. júlí að tveimur árum liðnum. Kjörgengum starfsmönnum er skylt að taka við kosningu til deildarstjóra. Endurkjósa má deildarstjóra, en hann hefur rétt til að skorast undan endurkjöri. Sá sem gegnt hefur embætti rektors, getur jafnframt skorast undan kjöri til deildarstjórastarfa næsta kjörtímabil eftir að hann lét af rektorsstörfum. Láti deildarstjóri af störfum skal kjósa deildarstjóra fyrir þann hluta kjörtímabilsins sem eftir er.

14. gr.

Almennir starfsmannafundir.

Almennir starfsmannafundir eru haldnir til að ræða málefni háskólans. Rektor boðar til starfsmannafunda eftir þörfum. Jafnframt geta deildarstjórar boðað til sérstakra starfsmannafunda innan deilda.

15. gr.

Um samráð við aðra háskóla og samstarfsstofnanir háskólans.

Háskólinn á Hólum og einstakar deildir hans skulu hafa samráð og samstarf við aðra háskóla, bæði innlenda og erlenda, til að nýta sem best tiltæka starfskrafta, gögn og aðstöðu og stuðla að fjölbreyttari menntunarkostum í samræmi við lög nr. 85/2008 og nr. 63/2006. Háskólinn á Hólum er þátttakandi í samstarfsneti opinberra háskóla. Leita skal samkomulags við samstarfsaðila um gagnkvæma viðurkenningu námsþátta. Háskólanum er einnig heimilt að gera samstarfssamninga við aðrar stofnanir sem tengjast starfssviði háskólans. Deildarstjórar og sviðsstjórar skulu hafa forgöngu um samstarf og samræmingu í ofangreindum málaflokkum.

16. gr.

Um staðarhald og samráð við aðrar stofnanir á Hólum.

Rektor ber ábyrgð á staðarhaldi á Hólum og samstarfi við Sveitarfélagið Skagafjörð. Jafnframt sér rektor um samstarf við aðrar stofnanir á Hólum.

17. gr.

Gæðaeftirlit.

Í Háskólanum á Hólum skal fara fram reglulegt mat á innra starfi háskólans, sbr. lög nr. 85/2008 og lög nr. 63/2006. Háskólinn á Hólum setur sér siðareglur, umhverfisstefnu, starfsmannastefnu og jafnréttisstefnu.

III. KAFLI

Deildir og akademískir starfsmenn.

18. gr.

Deildir háskólans.

Starfsemi Háskólans á Hólum er skipt niður á deildir sem hver um sig ber ábyrgð á þeim kennslu- og rannsóknnaverkefnum sem tilheyra viðkomandi deild. Deildir Háskólans á Hólum eru: ferðamáladeild, hestafræðideild og fiskeldis- og fiskalíffræðideild. Meginmarkmið ferðamáladeildar eru að afla og miðla þekkingu um ferðamál í dreifbýli, til að auka fagmennsku, nýsköpun og tryggja sjálfbæra uppbyggingu ferðaþjónustu á Íslandi. Í starfi deildarinnar er lögð áhersla á gæði, samstarf og fjölbreytni. Markmið hestafræðideildar er að veita fagmenntun í hestafræðum, reiðmennsku, reiðkennslu og tamningum sem og að vinna að þróun og nýsköpun með rannsóknastarfsemi. Með

Þessum hætti verði stuðlað að aukinni arðsemi í atvinnugreininni, útbreiðslu hestamennskunnar og velferð hestanna. Markmið fiskeldis- og fiskalíffræðideildar er að afla og miðla þekkingu á fiskeldis- og fiskalíffræði, auk sjávar- og vatnalíffræði. Deildin stuðlar að faglegri uppbyggingu fiskeldis í anda sjálfbærrar þróunar. Markmiðum skólans er mætt með kennslu, rannsóknum og þróunarverkefnum í samstarfi við atvinnu- og fræðasamfélagið innan lands sem utan.

19. gr.

Akademískir starfsmenn.

Við Háskólann á Hólum starfa prófessorar, dósentar og lektorar. Þeir eru fastráðnir starfsmenn og starfa við kennslu, rannsóknir, stjórnun og/eða önnur þau verkefni sem þeim eru falin af rektor og deildarstjórum og almennt falla undir starfssvið háskóla. Heimilt er að ráða aðra starfsmenn til sérhæfðra starfa. Jafnframt er heimilt að ráða aðjúnkta til tímabundinnar kennslu og fræðistarfa. Um starfsskyldur, réttindi og ráðningar starfsmanna fer að öðru leyti eftir kjarasamningum og nánari ákvæðum í lögum og reglugerðum.

20. gr.

Um rannsóknaleyfi.

Rektor er heimilt að veita fastráðnum starfsmönnum háskólans rannsóknaleyfi í samræmi við reglur þar að lútandi.

IV. KAFLI

Nemendur, kennsla og próf.

21. gr.

Rektor og háskólaráð setja sérstakar námsreglur um nemendur, kennslu, próf og skipan námsbrauta.

V. KAFLI

Gildistaka og endurskoðun.

22. gr.

Reglur þessar eru settar samkvæmt heimild í lögum nr. 85/2008 ásamt áorðnum breytingum og öðlast þegar gildi. Þær skal endurskoða eigi síðar en tveimur árum frá undirskrift þeirra.

Þannig samþykkt af háskólaráði Háskólans á Hólum, 4. janúar 2017.

Erla Björk Örnólfsdóttir rektor.